

四庫全書

集部

欽定四庫全書

中庵集卷十六

元 劉敏中 撰

碑三

敕賜資德大夫中書右丞商議福建等處行中  
書省事贈榮祿大夫司空景義公布哈爾神道  
碑銘

有元大德三年冬十月某日資德大夫中書右丞商議  
福建等處行中書省事布哈爾薨于京師詔賜中統寶

鈔二萬餘千緡以驛傳負其櫬歸葬泉州命有司議贈謚撰墓碑而其文以命臣敏中臣謹按禮部事狀公本名薩題世西域人西域有城曰哈喇哈達其先世所居也遠祖徙西洋西洋地負海饒貨因世為賈販以居父布哈爾得幸西洋主使與諸弟齒弟有五人布哈爾稱六弟俄總領諸部益貴富侍妾至三百人象床黃金飾稱是布哈爾歿公克紹其業王益寵凡召命惟以父名故其名不行而但以父名稱焉聖朝之平宋也公聞之

喜曰中國大聖人混一區宇天下太平矣盍往歸之獨遣使以方物入貢極諸瓌異自是終歲不絕復通好親王阿布哈斯二郎凡朝廷二郎之使涉海道恒預為具舟楫必濟乃已世祖熟其誠款至元二十八年賜璽書命某部尚書阿爾班侍郎拜特穆爾列名往諭且召之公益感激乃盡捐其妻孥宗戚故業獨以百人自隨偕使入覲既見世祖加慰諭賜以錦衣及妻廩之公館所以恩遇良渥聖上嗣位特授資德大夫中書右丞商

議福建等處行中書省事累賜以鉅萬計而寵數益隆矣至是年來朝遂以病薨享年四十有九賜妻蔡氏先公卒再配某氏子男一人女二人公薨之始上未知問左右布哈爾疾愈否左右以對上惻然久之曰彼遠人今若是良可嗟悼於是有葬贈謚碑之命有司議贈榮祿大夫司空謚景義公其賜妻曰靖惠夫人制可勅江浙等處行中書省給其所賜寶鈔且董其葬事仍別降綸旨護其家無敢陵犯上且曰使彼俗聞之寧亦喜耶

蓋上之所以重遠人而公之所以獲上意者如此臣竊  
欽惟我國家列聖相承以至仁遇九有以至誠待羣下  
自旬服要荒至矜寡孤獨無所遺自大材殊勲至寸長  
微勞無不錄龐乎如天地之成萬物而其發育斡旋之  
妙莫知所以然浩乎如江海之下衆流而其渟蓄涵泳  
之大莫究其所極人生於其間油油熙熙無有大小外  
內罔不得其所欲故智者罄其慮勇者畢其力能者竭  
其才而賢者成其功是以治效之盛歸巍煒煥直與三

五比隆而版圖之區聲教所暨者過於漢唐遠甚仁之  
洽誠之格也嗚呼山海遼絕之俗木石崎嶇之人得一  
觀國光霑聖化以識夫乾坤日月之大全誠千載一時  
也而公輒能慨然感固陋之習審去就之義抗剛忠之  
節會休明之期用能荷恩兩朝登庸貳相沒則有謚墓  
則有碑生有餘榮死為不朽矣彼有取舍不明以險自  
欺甘于僻左幽昧泯泯待盡者視公為何如哉臣既述  
其行乃作銘曰

皇元聖德叶卑高風霆作威雨露膏善良子惠惡苗薈  
分此薰蕕辨松蒿四門廓達登夔臯暨百執事皆英髦  
干戈載戢弓矢橐氛祲不作絕兵鏖龐恩汪濊逮不毛  
丈夫犂鋤婦蠶繅王風熙熙物囂囂異方詭俗多繹騷  
睚眦戈戟聲哮晷天狹地窘不可逃安得大化歸甄陶  
偉景義公乃人豪起望白日心滔滔先一介貢連飛艘  
越裳之雉西旅獒珠貝象犀雜金刀九重使者旋麾旄  
從以百夫躡風濤忠心陞見聖所褒萬里慕化卿其勞



賜以女妻宮錦袍又為築館加餽牢貳相繼命恩非叨  
千載一時公實遭隙陰不駐難持操一昔朝宿聞號咷  
豐碑顯謚示爾曹慕此何畏鯢鯨鰲大德四年二月日  
撰

勅賜推忠保德佐運功臣太傅開府儀同三司  
上柱國韓國公謚忠獻李公神道碑銘

皇慶元年十一月二十九日集賢大學士榮祿大夫臣  
陳顥奉聖旨李道復父母既塋碑石未立其令翰林承

旨劉敏中撰文集賢大學士劉賡書翰林侍講學士郭  
貫篆額臣敏中承詔謹撫鮑思義所為狀序而銘之嘗  
謂物惟蘊則大陽蘊於闔大於化陰蘊於闢大於成山  
林蘊而雲雨草木蘊而華實大矣人之蘊其大為事業  
大不究蘊將必有待而所謂待者非惟其子孫耶公既  
沒之五年其子孟益貴於是公之蘊始大以顯古人有  
言仁者必有後公足以徵之公諱唐字仲卿姓李氏後  
唐雁門之裔世為潞著姓仕終略陽縣尹贈榮祿大夫

上柱國潞國公加贈推忠保德佐運功臣太傅開府儀  
同三司上柱國韓國公謚忠獻曾祖考諱裡金進義校  
尉曾祖妣夫人門氏祖考諱執字長卿以貲雄嘗事科  
第弗利輒棄去獨以節義名其急人之急若火券若代  
祖若助婚聘給喪葬歲必滿三百六十人以為常贈上  
黨侯加贈濟美功臣光祿大夫平章政事柱國公謚康  
惠祖妣郭氏劉氏並封韓國太夫人三子皆劉出昌遇  
昌期失于兵亂昌祚公之父也字天錫七歲能詩十歲

舉經童長同監潞州稅國初佩銀符潞州招撫使有惠  
政及人贈上黨郡公加贈保順守正功臣金紫光祿大  
夫司徒上柱國韓國公謚文靖母夫人鄭氏封韓國太  
夫人公資端重寡言笑平居未始以聲色加人至其義  
之所在則毅然弗顧博學多藝能於國朝語尤習未冠  
從軍秦隴間歲戊申瓜爾佳沔國公行興元西川省事以  
能補部吏未幾辟行省掾興元境與宋交動尋干戈兵  
機密務悉掌於公時沔國暨利帥圖爾哈皆英才宋人

病之邏騎或得宋制司遺檄以獻云圖爾哈先令納款  
莽哈岱後遣申情公曰斯儻言行間耳遽焚之莽哈岱  
沔國小字也辛亥四月宋四川帥余玠瀆我南鄙據中  
梁山衆號十萬雉堞樓櫓一夕皆具我城中兵不滿五  
千皆愕眙以為神公獨曰是特以竹木障席箔而塗之  
堊耳逮夜火舉中梁旋視四山皆然沔國登樓色動顧  
左右曰果大敵也公又言是特添竈之比人執數炬如  
約而舉耳且大兵遠來當乘銳速戰顧乃棲薄高險銳

於何有其計不過虛為聲勢猥利驅掠而已可堅壁以老  
之伺其退遣驍騎控于阨剪之必矣有悍卒數十號巴  
圖者願出所營自効沔國將遣之公聞馳告曰此輩無  
賴苟知徼倖萬一脫有不利則我之虛實即為彼知誨  
盜之道也沔國矍然曰微子言幾殆數日宋人果宵遁  
追及松樹平大敗之盡棄其俘獲而去沔國使覆其跡  
一如公言由是器重之擢刑部主事有詔沔國得以軍  
法便宜從事公全省者甚衆士子沔國改軍民萬戶公

為知事甲寅太傅邁珠行省興元公復入掾仍領前職  
戊午用採訪薦授興元轉運司知事中統二年改安撫  
司知事四年陞轉運經歷官至元二年遷軍儲所經歷  
六年以職官選補四川行中書省掾聲譽益出八年復  
還軍儲幕不就雅愛漢中山水乃結廬教子孫樹藝以  
居里有訟久弗決者往往就質於公徐以理開諭皆愧  
服罷去有及門自平而退者夫有以信于人也二十三  
年授從仕郎夔州路總管府經歷辭不允乃就間攝府

事凡六年始夢無蠶織公教以樹桑民知利焉作廟學  
築牆植杏率師生莫祀講習土俗為變聞人疾輒割俸  
金濟醫藥常若不及所居衡茅蕭然邦人請葺之則曰  
無為勞爾也竟弗葺及去民攀留不可競遮道鳴簫鼓  
書綵旗為餞有六載恩波夢國滿一船明月漢川歸之  
句元貞二年以徵事郎除略陽不就嗣子孟游京師以  
徽仁裕聖皇后命侍講今上潛邸久之請歸侍不許公  
聞遣書戒勿請而孟請益切大德四年有命迎致就養



公至廩遇優異歲時賜謁上壽成禮而退日杜門端居  
獨以經史自遣遇所得輒細字書之因輯而成編命之  
曰客窓敗衲其高曠有如此九年孟有扈從覃懷之行  
公及家人長幼皆從明年丙午從幸搢簪山道賜藥餌  
費錢三千緡次冀寧五月十二日以疾終于玄都觀之  
松風堂春秋八十有一是冬南下旅殯覃懷皇慶改元  
三月十一日葬于潞城東十里上黨慶雲山集家原之  
新塋嗚呼以公平生觀之所蘊可知已夫人王氏靜淑

慈正克相厥家婦道母儀中表以為法卒殯興元壽年  
五十有五至是祔焉贈潞國夫人加贈韓國太夫人四  
子長即孟次槃次森次添孟字道復業儒器宏偉有經  
世略至大三年庚戌以佐命功授榮祿大夫集賢大學  
士同知徽政院事逾年聖天子龍飛拜光祿大夫中書  
平章政事特封秦國公兼翰林院學士承旨知制誥兼  
修國史娶劉氏卒贈韓國夫人繼賜宮人納哈塔氏封潞  
國夫人改封韓國夫人槃承直郎興元路洋州知州娶

孫氏森奉訓大夫晉寧路潞州知州娶劉氏漆幼庶出  
女四人長適馬忠次適王德明次適陳天錫次適馮關孫  
五人曾孫四人公之塋也奉命遣其姪朝列大夫祕書  
少監信馳驛于覃懷于興元奉公之柩與韓國太夫人  
之柩會于路長子孟賜告賻有加特勅中奉大夫昭文  
館大學士祕書監卿溫德榮偕傳以往實相之也承武  
郎中書舍人曹由張遵義輔行既至賓親畢集襄事如  
禮觀者榮之嗚呼生不足而沒有餘其亦可以慰矣銘

曰

萬斛之航底于濫觴九霄之翮止乎榆枋天道茫茫識者慨傷蓋嘗致其用于百中之一固已脫穎而殊常有子以大其家晚節乃昌榮養優游既壽且康松風夢長邈仙游兮歸故鄉眷茲雲山之原玄宅允藏伐石勒銘載是寵章孰知夫生平客窓之敗衲而易此身後大國之袞裳是之謂固有必有雖亡不亡以一時之遜抑為萬世之耿光也耶

贈奉政大夫驍騎尉大同縣子蕭公神道碑銘  
中順大夫叅議徽政院事蕭君塔布台持趙元溥所狀  
先大夫行實請曰不肖孤生遇明時濫階通顯洪惟聖  
天子道隆孝治禮遇臣下先考妣與霑大恩光荷封爵  
思所以侈寵榮慰寃宥宜有旌紀傳信不朽余嘉其誠  
為次第之蕭本契丹貴族舒穆魯氏公諱君弼復改蒙古  
岱贈奉政大夫驍騎尉大同縣子先世西京桓州人後  
徙應州大父而上譜牒不存考阿拉克巴圖爾當金錄

之訖太祖皇帝奮起朔方疆理中夏在邊諸郡桓當其  
衝帝駐驛近郊遣兵圍之守者懼以君素勇畧服人且  
習蒙古語遂署為倅以自輔時旁郡皆降桓獨拒守有  
詔城破當屠之謀者以告君私謂食盡援絕不可復支  
吾徒死自其分如生靈無辜何遂效國俗翦髮為髻著  
巾夜縋而出邏騎以見帝責爾曷敢拒我君即脫巾露  
其髮自明辭色無變帝壯之輒遣入城開諭乃降民死  
而再生君之力也自是日承眷遇凡天戈所指君皆為

前導若取雲中收鳳翔至撫有西域其勞居多歲庚寅  
太宗皇帝大舉伐汴選才堪近侍者君為選首汴平凱  
旋君所俘戶幾四百抵相州時兵荒之餘所至艱食復  
慮北方地寒衆必難保獨取壯健者五十戶以北至應  
州擇沃土居之今名蕭家寨云是徙居應者乙未詔呼  
圖克籍在所戶口君遂以俘戶獻呼圖克命君收及百戶  
方入籍有方士布濟克號神人勅賜戶奉其廩稍乃以是  
戶畀焉仍錫君璽書金符世為宣差以長之今三世矣

君以丁酉春秋六十卒君為人剛正尚義凡攻下城邑  
取其有藝術者出之所全活甚衆桓之降也太祖特以  
城中所獻金手推與之俾結以衣裾滿乃已其眷愛如  
此配許氏郭氏欽察氏許有操行君沒十餘年間攝官  
事綜家務井井有緒郭即大同公之母出許昌著姓資  
溫性慧嘗翦髮易香火祝慶夫子內助可知已後君十  
五年卒三子長仲嘉努次蒙古岱大同公也次多揚二  
女翠哥蘭哥適名族仲嘉努襲職宣差配王氏生子三



女二男孫七女孫三多揚早卒配劉氏子一女一男孫  
二大同公天性孝友生六年而孤哀毀如成人既長有  
立志事諸母接昆季備愛敬之實初襲父官讓其兄去  
而就學大同治當諸王朝會往來之衝有司以供億被  
譴責是患乃辟公為館伴公素練國典且閑譯語而又  
應對辯敏故譴責弗及而公私賴之後從事宣撫司補  
克呼穆爾齊譯云通事尋以是職遷河東山西道提刑按  
察司以其能也至元丁亥中書平章政事札實御史中

冰色埒默使甘肅還經大同見公一與語大加賞異歸  
薦於御史大夫太師伊嚕公擢內臺克呼穆爾齊謹密諮  
大體風憲屬望太師甚重之庚寅奏拜行臺監察御史  
命且下感疾而卒搢紳惜焉實大德元年正月五日春  
秋六十又五某月某日葬于應州蕭家寨之先塋公再  
娶子男六人女一人孫男女二十有七人先夫人王氏  
內範純備生四子長曰珠爾噶岱攝宣差卒娶安氏子  
一女五男孫二曰宣堅州酒稅使娶韓氏子三女二男

孫二曰阿雅噶齊應州副酒稅使今為管領大同等路民  
匠克埒口提領娶石氏子一曰特穆爾早世娶李氏子  
一女缺繼夫人察罕塔塔爾氏封大同縣君仁恕恭儉撫先  
夫人之子如已子母儀家法中表為式生二子一女女  
曰香童適同郡李氏子曰與章管領宣德隆興等處諸色  
民匠齊哩克昆副長官英爽工騎射好獵每獲鮮肥必進上興  
聖宮用錫寶書護其家娶常氏子四女一女孫一曰塔  
布台即中順也娶張氏封大同縣君子三刷格爾伊埒女

一精書本皆幼中順君始宿衛懷寧邸用大官薦給事興  
聖宮大德丁未扈從今上皇太后歸自覃懷與平內難  
奉命馳和林勸進武宗繼統錄功授奉訓大夫平江路  
財賦提舉司達魯噶齊未赴以皇太后旨改甄用監丞  
至大己酉陞奉政大夫叅議徽政院事皇慶改元進階  
中順於是有追封之命嗚呼天人之相與昭昭也舒穆魯  
氏自宣差君邁時經綸奮身戎行間釋難濟危計所全  
活不啻千萬宜其享有為善之福而位不及通貴年僅

登下壽夫以公負倜儻有用之才使得遭逢盡展所能  
必有大過人者竟以數奇遭迴弗遂而沒天道其難知  
耶夫室久者達必遠積厚者發必大故未幾何而賢嗣  
以翌戴之勤攀龍附鳳立登華要優恩渥命光昭前美  
太君年踰八秩安享榮養子孫滿前蘭玉輝映一門福  
慶罕見倫比由此觀之天道何難知耶銘曰

天高聽卑福生有基善惡之應影響其隨惟公奕葉素  
勤積累諸慶流芳貽厥孫子侃侃中順策名熙朝翔扶

跋涉盡瘁孔昭班賞第功疊承恩獎鵬程九萬扶搖直  
上皇慶孝治隆養璇宮從容徽府幕畫生風茅土疏榮  
追念先志龍篆鳳書松楸增賁過庭之訓燾後之仁昔  
晦今顯忠孝一門載辭貞珉美匪我溢以諗其嗣人繼  
繼母替

勅賜贈榮祿大夫司徒柱國梁國文惠公王公神  
道碑銘

公既歿之十又五年其子約仕益貴聖天子眷益重公

以三代恩典贈榮祿大夫司徒柱國追封梁國公謚文惠夫人成氏追封梁國夫人詔臣敏中撰文碑其墓道且詔臣賡書臣貫篆額臣謹按事狀公諱松年字堅甫姓王氏上世汴梁人大父諱因贈翰林侍讀學士中奉大夫護軍追封汴梁郡公謚敬懿祖妣張氏追封梁郡夫人父諱通字慶祥贈資善大夫中書右丞上護軍追封汴梁郡公謚莊穆母陳氏追封汴梁郡夫人勤儉多內助莊穆卒蔬食終身叔父諱顥志大命奇竟弗遂終叔

妣閭氏莊穆公為人溫謹博愛好施天兵圍汴民饑日持糗糒食孤弱全活者衆遇婦人詬其夫於途問之泣曰家貧里胥責夫爾賦已代輸爾亟貸子錢為償夫往遲至使妾迎夫則悞遺所貸子錢為將柰何乃大哭莊穆曰勿哭其償幾何曰若干探囊畀之不問其姓名夜有盜家人弗知旦緝得其迹將捕之莊穆曰所喪能幾忍彼一家終被惡名竟寢里中稱為長者三子公其仲也甫三歲汴潰父母挈以北徙寓真定未冠父卒兄大



弟幼能力貧養其母中統癸亥輦母家京師數歲遣子約如真定舉其父之櫬殯于燕至元丙子十二月二十二日母卒合葬京師南之烽臺鄉公嘗職金穀戶曾侍郎乃其同學生往謁弗見公怒出謂其所偕曰銜貴勢而忘故舊淺矣吾惟一子教之學安知他日不若彼之所至邪歸語約曰奮汝志無忘吾辱乃不復仕叔父有高識約垂髫時每指示公曰是兒風格不凡異日必興吾宗至是公益勉之壬午約由國史編修官辟掾中書知差

除選人欲預知所得密以屬公公謝曰選事嚴掾奚敢  
泄是後約洊厯華要公未嘗恃子顯以自矜常以小心  
謙抑勗其子之不逮大德三年己亥得疾尋稍瘳辛丑  
約以翰林直學士奉旨賑饑畿縣公疾復作衆議將召  
約公聞之曰饑民待哺使者兒來如彼何竟弗召其所  
以期其子者遠矣明年壬寅六月疾革十三日卒於正  
寢享年七十有三以是年八月二十三日葬於京西岡  
之原之新塋梁國夫人成氏祔而考妣暨其叔考妣之

葬胥遷焉以烽臺湫隘故也公天質孝友慈祥篤實世之囊橐機穽不知有之人百欺不一校絕口不訾人之短無一毫負人嘗謂約曰凡家奴有子勿復奴彼亦人耳可奴及再世乎約嘗欲市一僮券曰假子公曰名子而實奴之若何乃止家無餘產課諸僮賃遷以仰給而尤樂施予喜賓客時乘小車與里社耆舊游裕如也其平生可知已梁國夫人秦中望族父旭為國尚監家真定以生資聰悟儼恪御內治寬而法接姻戚和而誠婦

道母儀中表矜式約始學至仕資給進誘循循焉惟以  
輔成文惠公之志也及疾謂約曰我疾非藥能起醫來  
竟不餌其藥夷然而逝至元三十一年八月十九日也  
春秋五十有九子約以文行器略官厯禮刑二曹尚書  
太子詹事河南河北行中書省右丞徵拜集賢大學士  
官榮祿大夫婦某氏梁國夫人孫男一思誠女二在室  
易曰積善之家必有余慶又曰謙尊而光卑而不可踰  
言天道也公始襁抱罹播蕩之厄結髮振厲舍危圖寧

以孝弟勤恕理家而家以立以恭慎遜抑教子而子以顯卒之門閥地望鬱然為一時名臣其于向也戶曹郎為何如耶惟公志明德壹故其取應如響本乎天道也所以封大國加顯號錫銘載美流耀于無窮豈非天乎嗚呼公其可以慰矣銘曰

行有萬殊善莫與競變有萬幾謙不可勝得是二者惟公其人以天合天靡屈非伸身為世賢子為國器端委立朝輔弼之貴其原有歸曰惟公休褒恤是崇命秩孔

優寵銘茲石萬世餘侈識者所嗟是父是子

故昭文館大學士大司農郭公神道碑銘

中統至元之治人材全出大率儒以通達任吏事而不  
以冗劇病吏以廉正資儒術而不以迂濶害濟濟乎盛  
矣若夫備儒吏之用盡才猷之美淳忱雅曠襟度叵測  
復然為一時標準則昭文公其人也公諱筠字伯川姓  
郭氏曾大父諱謙配陳氏大父諱祐金尚書省令史配夏  
氏父諱義字信之金懷州同知始配劉氏早卒生女適

張氏再娶靳氏公初生懷州君以金季亂自汴徙邳又徙青今遂為青州人公生九年失母十一年失父輒能警省自持從師讀書嶷嶷有起家之志踰冠推擇為吏凡五轉至中書掾能譽益出秩滿乞外補相臣以見上顧問優渥授承直郎彰德路總管府判官實至元八年辛未歲也始視事更民所不便者民大悅未幾以樞密院都事召俄陞經歷加奉訓大夫儀矩言論朝著瞻聳丙子以中順大夫同知泰州路總管府事時江淮甫定

有謀不軌者獲之辭連富民何姓兄弟皆掠服具獄公  
至當覆按二人號泣自明知其冤乃更開誘窮詰首惡  
者窘始言嘗有貸於彼弗得故誣之彼實不與也二人  
以得釋不死而乃恤孤賑乏揭條約通達示以好惡於  
是闔境肅然大治改同知嘉興路法制清明庭無留訟  
日以興學勵生徒為事民俗為變夏旱甚民困公潔齋  
與衆致禱雨隨降歲以有成士民誦之知其于政治精  
誠素積也用憲府薦除江南浙西道提刑按察副使常



以正己正人救其屬咸畏憚之吳郡有兄弟以財訟久弗解公諭之曰兄弟同氣財外物柰何以外物之畷而忘同氣之愛乎若是天倫喪矣今以三日假汝往歸與汝所親耆德者共議以來吾為汝決及期二人與所親拜堂下泣涕慚悔言曰小人不識義理為貪墨吏所悞微公教幾墮禽獸願自新由今日始公慰遣之二人旦夕炷香祝公于庭卒相睦為賢昆仲裕皇在儲闈聞公名命以遽召擢樞密院判官時征伐久息而軍職頗冗

公奏為更定一皆稱旨乙酉遷兵部侍郎蓋公官泰州至是凡五遷而階猶其舊同列者皆更超顯未始幾微見于辭色逾年授太中大夫浙東海右道提刑按察使會權姦擅政奏遣使諸道理逋負覆欺隱實假威福以鉗制天下所遣多清流欲幸其不職中之而公在遣中諸道往往畏威希旨網羅無清濁虛實曲搜旁延掠治百至有弗堪赴水火鳩縊以死公獨不然凡訟効無迹者皆置勿省虐不及衆而事亦無殆改按察江東建康

道盜發績溪橫甚公親督兵下之戮其渠魁辛卯權姦  
敗誅希旨者皆相繼殄黜而人益賢公矣朝廷更化以  
嘉議大夫僉江淮行尚書省事尋改行中書十二月僉  
江浙中書省事江浙金穀歲入倍于他省公為已任井  
井皆辦大農以最聞而有賜帛之命癸巳以年請屏居  
錢塘念其先府君嘗構堂于邳名愛菊乃植菊舍下復  
扁是名曰先志不敢忘也幅巾野服相羊山水間蓋十  
年大德癸卯成宗思任舊人召至闕授昭文館大學士

中奉大夫商議中書省事而河南陳緱山天祥東平張  
寓軒孔孫實偕召共事時望顯然有三大老之目首言  
左丞相達爾罕清忠正大有經世具必專任俾無沮格  
患天下可大治俄而達爾罕拜中書右丞相眷倚日重  
中外蒙澤公之力也先是河東地大震詔羣臣議公以  
為陰逼陽伏鬱不得發天地中和之理失故有是變具  
陳所以致中和者凡八事得失了然奏聞詔中書議施  
行焉一日嘆曰吾年八十尚可戀榮寵邪即請歸屢奏

乃允省寺皆輟務具酒饌都門為餞觀者榮之尋以昭  
文館大學士加資善大夫大司農其見優禮如此還錢  
塘候者日滿門語未嘗及他時獨引觴嘯詠自若其興  
寄有在焉也俄遘疾以至大已酉十二月四日薨于正  
寢春秋八十四子友直奉其柩墓于青之臨朐仁壽鄉  
彌河西源先人之兆次娶凌氏早世無子繼耿氏淑德  
令儀克相厥家年七十有六以大德元年丁酉三月二  
十六日卒子男一友直也女三適李氏喬氏張氏男孫

二友直博學有通才累官奉訓大夫紹興路總管府判  
官以公行實請銘嗚呼公早以邁倫之姿厄于孤弱卒  
能鯤化豹變奮揚明時貴冠五等年躋上壽完壁無豐  
類之指作室有堂構之託始始終終可謂無遺憾者矣  
敬為之銘銘曰

世有善人乃國之紀百年自昔如公者幾在童髫煢四  
顧無倚心格神會孰興孰啟寸木百圍勺水千里磅礴  
功名出入赫煒蒲車晚節雍容園綺儀鳳景星有目所

企忠言剴切人猶在耳康寧壽考嘯詠燕喜公生匪天  
奚具斯美爰念公德九原莫起載之貞珉其永曷已綿  
綿餘慶貽爾孫子皇慶二年癸丑正月日撰

故肅政廉訪司經歷趙君神道碑銘

漢儒董仲舒兒寬公孫弘之徒皆能以儒術緣飾吏事  
號通才竊嘗偉之蓋儒以經術專而吏以文法行言之  
於學則經術本也文法其末也專其本而遺其末則其  
弊也或失於牽泥而不通迂濶而難用行其末而遺其

本則其弊也或失於削刻而少仁巧倖而不貞二者之  
弊不同而其失一也故必儒焉而達乎吏吏焉而又進  
乎儒則本末相資而後可以無二者之弊自予官京師  
殆三十年凡以儒獲顯名踐清途者可識而數焉若君  
者吏而進乎儒者也君諱昌字壽卿世為濱之渤海人  
君幼慧敏不好戲弄稍長從吏學始為濱司候吏乃更  
折節讀儒書求義理以自淑尋補州吏轉濟南總府掾  
至元戊寅用監察御史薦入臺為察院吏會御史奏雲朔等



州吏職不虔錢粟盜匿狼藉詔近侍與御史就治而君以推擇從君知其弊久為之悲心力窮晝夜掩簿券以控其根穴資耳目以抉其脉縷如燭照龜卜無所逃遁為姦者具服詔使以為能還言之臺遂以將仕佐郎除江東建康道提刑按察使知事實壬午三月也已而以贊畫稱明年選充行御史臺掾又再歲入為內臺掾方大姦據相位假威福橫甚奏遣使諸道覆覈姦賊檢括逋懸敲撈徧於郡縣實示脅制甘天下之口所遣使有

異已者因中傷之治書侍御史河南陳公剛正敢言大  
姦忌故亦在遣中得湖南道河南知其意擇臺掾可與  
偕者獨以君行湖南行省有位平章者根柢連大姦肆  
虐焰焰河南至首劾其顯惡數十以聞其人懼則架空  
媒孽數事誣河南馳移大姦大姦奏遣使先知之於是  
君與河南并繫湖南省河南雖困辱自直不挫而君力  
助之時大姦風指所在莫不股栗草靡以附君於是時  
苟一語之異則榮利立可得而河南危矣卒確然不渝

以死生與河南同憂苦至大姦敗誅相扶而還議者謂河南有知人之明而得其所舉謂君有國士之義而不負所知也尋以承事郎除西蜀四川道提刑按察司經歷居再歲本道例改肅政廉訪司官職更授如故而衆譽藉藉謂其才謀得風憲之體癸巳四月自以病歸明年六月一日終於家得年五十有七葬於州南二十五里天王堂之原先塋之兆次禮也後十一年其子去私以君之善狀請予文碑其墓道以申罔極之報君父子

曩與予游皆甚款故不可辭君為人溫醇壹言笑無所  
苟平居衍衍儼然一儒者及其接政事履繁劇則厲然  
如鷺鳥之作而其守凜然如水霜不可干以私要其為  
心一主於誠期必至於是焉而後已得儒教時中剛克  
之義故凡識君者無有貴賤疎密皆曰趙君無吏氣其  
為人所敬信如此嗚呼君之才量氣節見于行事者僅  
百之一耳使盡得肆其所蘊則其所到蓋未可量而遂  
止於是其命矣夫父諱善方慈祥樂施予好釋氏書家

素饒諸所稱貸歲遇不登則焚其券不責鄉里德之卒  
年八十二母孫氏諱守信壽六十三先卒二姊長贅張  
氏次適齊氏君配夫人李氏諱守榮備諸婦道無恙子  
男一人去私也女四人長適吳氏次郭氏次薛氏次劉  
氏去私業儒好學有文由中書掾出為章丘尹轉饒州  
路總管府判官皆有惠政今以奉訓大夫知嵩州觀去  
私則可以知君故併及之銘曰

儒而偽惟吏之弊吏而誠惟儒之能儒有不能子能服

膺衍衍接物之和蹇蹇幹事之貞衆驚以名子獨安行  
衆以利爭子獨廉稱出入風霜肅殺之地亦厥有聲胡  
位不滿德而祿不永齡惟肯構肯穫之有託尚永慰夫爽  
靈松楸冥冥豐碑戕銘彼猜徇矯虔者過而拜之庶幾  
可徵

故少中大夫同知南京路總管府事趙公神道  
碑銘

公諱珪字君寶世家弘州後徙燕遂為燕人焉公資開

敏剛正未冠失父與兄壁侍母避亂遷魏又遷長安益  
長辭母東遊過真定寓神霄宮掌教識其先世憐之留  
使從學遂至于有立始以真定課稅所辟翰靖海場鹽  
官市帛當送輸京衆憚之公獨請行既輸從領省溫都爾  
哈爾滿覲和林一日太宗方宴縛領省出錮直廬中莫  
測所以罪從者皆散匿獨公在側領省勉使去竟弗動  
翌日內出酒一器敕領省飲酒墨色知賜死領省伏飲公  
從旁亦取飲既移晷靜無所覺敕使視之問曰嚮酒汝

所進果何酒也領省悟對曰臣所進白金新製藥滓未  
久涉遠故酒敗色渝斯誠臣罪當死帝悉其誠釋之領  
省義公異常人奏授領中書郎中以歸中統建元改上  
都開平路總管府經歷官有捍難安衆之策世皇薨之  
賜名實喇薩哈勒圖賜金符授開平路課稅使三年擢領  
中書左右部參議規畫日聞愈為上知嘗入見賜食如  
忘上問之對曰臣母老寄長安方食而感故然詔有司  
致其母于京以便養時姦臣擅柄傾內外以公獨不附



忌之公輒去至元七年駕幸上都道雲州州織局廢敕  
中書擇人姦臣以公應詔除雲州織局提舉雖以能選  
而官左責難實擠之也公勉力就職未幾匠亡而復課  
失而倍又積勞絲織錦衾以進能譽益彰秩滿奉命佩  
金符城興松二州安輯其人姦臣復嫉公雲州之能以  
名磁鐵冶都提舉治效如雲州姦臣卒不能害而公亦  
終不一下也十四年楮幣法滯以中順大夫行戶部侍  
郎大名分治之十六年詔檢覈金穀山東尋除少中大

夫同知益都路總管府事以未復命不赴明年改同知  
南京路總管府事遘疾卒于官實十八年辛巳八月十  
日也壽年六十有三權厝汴之隆德宮遠祖仕遼有以  
國戚官節者曾祖諱昭祖諱雄飛父諱儒金河平軍節  
度使治汲郡金亡以節死母夫人傅氏公先配夫人舒穆  
魯氏二女長適定襄李從益今嘉議大夫治書侍御史  
銓其甥也次適李天祥再配夫人李氏一子曰思益二  
女適李氏馮氏思益為人英毅貞峻嶷嶷有父風以廢

授冠州判官改大司農照磨遷承務郎河間滹縣尹在  
官六年多異政民勒石頌德進奉訓大夫霸州尹婦李氏男  
孫二永章存章曾孫一奉訓君以翰林修撰王士熙所  
為公善狀謁於繡江言思益卜以年月日舉先人之柩  
歸塋燕之先塋墓道當有銘欲得公之辭以信不朽敢  
再拜以請奉訓與余舊無以拒序而銘之嘗觀古記節  
義之士精誠所發蹈死生弗顧窮達弗論也使人嘆息  
景慕以為不可復得嗚呼今以公言之獨非古人歟銘

曰

軼倫之才見於有為曲不直容莫究所期吾盡吾職憂  
懼非我而沉而浮往無不可禍當叵測國士與歸洪流  
方增底柱靡移衆人固不識惟天子知我銘于阡尚慰  
九泉凜然其風奚千萬年

故趙千戶神道碑銘

公諱信姓趙氏濟南厯城人世居章丘之固均鄉魯祖  
諱保義祖諱元祖妣王氏父諱忠母孫氏四子公其長

也次儼次儀公為人靜敏亮直而剛毅有氣早歲代其父為濟南張侯麾下彈壓至元六年天戈南指駐襄陽募兵公在選中使者識其可用俾長百夫以行既至給祿同上百戶總兵千人于安陽于方臺于曲阿于滾河于青塚築保障通轉運以才略聞厥後攻房方造舟公力戰盡焚其材而還圍樊奮擊先登焚其浮梁尋破之襄陽陷以功益高唐兵四百行總把事十一年大將右丞相忠武王擁兵卧郢了當上流堅壁以拒王舍郢盪

西港入漢水順流而下取沙陽秋城二堡下涪州公皆有功陽邏枕江北孺直南北之衝宋人堡以自安王與副將左丞相阿珠擣虛據南岸大兵徑渡公舟與宋將夏貴遇大戰敵手礮犯公背公弗痛翼健卒呼躍蹴其舟殺數十人衆潰貴走過江分命四討若鄂若漢陽若蘄黃若江池若安慶若泰興攻擊降取一以死力自效迄宋平其勞為多尋奉勅以總把授忠顯校尉成通擒戢反側嘯兇草間者前後以十數賜金符制擢授千戶

官武畧將軍在戍又十年請老有司以聞俄降制以其子世德嗣職公授其金符歸鄉里出則與宗戚故舊相羊言笑盡平生之歡入則以孝悌謹生理教諸子侃侃忘倦又十餘年一日思其子世德復之通居踰年卒延祐三年丙辰九月一日也春秋八十有六明年某月某日歸葬於所居北原先塋兆次子男六人女七人先配夫人李氏生女五三皆適王氏二適時氏崔氏再配夫人高氏生男一世德也字從政又谷氏生女一適崔氏

又潘氏生女一適張氏又金氏生男二曰世懋世傑又  
陳氏生男一曰世昌又張氏生男二曰世英世強孫男  
四人初公之應募也父母戒之曰人生莫大為善汝從  
役非戰勿妄殺人公拜受銘心無忘嘗遇行伍執一宋  
遺卒將殺之遽起遮曰殺此何益盍丐我負裝其愈乎  
許焉既得問卒言家揚州王姓公謂卒汝惟吾從無逋  
逃可全否則汝死矣維揚下縱之再歲公入維揚有男  
子迎拜馬前言公所活奴王也至館與其父母妻子宗



黨羅酒脯謝戀戀不能去平江陰叛俘一婦人言夫死  
兵二幼子不可知公曰吾家有老母汝能承侍無怠後  
當歸汝婦至果適母意俄母以八十終公使訪求婦家  
而二子在其長至公所公益哀之乃給婦券悉以母遺  
物資裝畀之從其子歸又大帥總兵討叛寇文梅其帳  
下兵命公統之他師遇敵戰不利沒其衆百夫長三人  
得不死大帥怒下令戮三人徇左右無敢言公徐前以  
數語釋其怒三人以免其素行類如此嗚呼忠武王以

間世大賢逢時稟命平江左壹聖統功冠萬古而其一時驅馳後先虎貔熊羆之士誠與有力也然紛拏之際取舍不同悍者以多殺逞貪者以攫利進由是以崩裂泯滅無聞者曷可勝紀獨公挺然以一甲抗萬險致死而功益倍力善而行益著卒之身榮親顯貽貴子孫耄期之年完壁以逝可謂決起特立忠孝兩全始終無憾者矣世德以公善狀懇余銘墓道余里人雅知公又知世德世德平居讀書好禮溫然一儒者至其有事則激

昂奮厲雄武傑出始嗣職聞虎害躍馬殺猛虎  
三勇震江淮有射虎將軍之聲噫是父有子而可辭銘  
曰

士生懸弧志在四方伸屈有時變化靡常始以荷戈勉  
勉卒行雷震風馳劃然軒昂氣以義盈勇孰與亢混一  
之隆厥績孔揚錫恩酬勞金紫煒煌攸好惟德終此壽  
康付託有子既構既堂載辭貞珉萬世耿光

贈奉議大夫驍騎尉聊城縣子陳公神道碑銘

公諱旺字天祿上世睢陽人譜逸莫詳後徙東平居汶  
上遂占籍焉父諱興幼孤母張嘆曰陳氏之託惟此兒  
以苦節自誓鞠育教誨之既益長讀書有立志天兵平  
汴負其母北渡始居汶闡小學為甘旨奉以孝聞嘗為  
征商官配母王氏三子公其仲也兄曰伸蚤世弟曰用  
字天祐里中稱善人婦呂氏姪男一德新穎悟通星歷  
學姪孫男四公潛德不試以子用晦貴贈奉議大夫驍  
騎尉追封聊城縣子為人淳壹恭恕力儉勤養親出入

懋遷馴致殷阜凡富室無與亢然未嘗一非義取亦未嘗一見義弗勇也若濟厄窮活餓饑赴急難日常與家事並諸子錢或陷乏莫償輒燬其券不復言至於洽宗黨接賓友侃然一本於誠東平人物都會高其行咸敬重之里有關公為一言皆慚悔謝去其德義可知矣及寢疾戒其諸子曰謹身承家人所當然貴義賤利人所希有汝曹第視吾平日所能行弗違遠大可期也生於丁未十二月某日卒於丁未十一月某日塋於汶之孝

義鄉之原配商氏靜謹多內助追封聊城縣君子男三  
長曰用晦次君諒授侍儀司通事舍人次用中女一適  
張誠女孫二用晦字子明既冠遊京師達官貴人見者  
無不賞異謂當為偉器由是交遊日廣皆信厚知名之  
士始從事省闈歷官甄用利用二監轉通事舍人陞奉  
議大夫崇祥院規運提點所在以才廉稱婦張氏封聊  
城縣君用晦以翰林檢閱官張深集賢修撰狀元張起巖為  
聊城公善狀因余子壻今利用監經歷官魏誼請曰先

人棄養奄忽踰十閱歲而墓道寂寥未有旌紀不孝孰甚先生辱惠以文載諸石則先人為不朽用晦亦可以瞑目矣余昔在京聞用晦之名已久頃歲再赴召始識用晦壻誼家通擴詳敏信其為偉器也知用晦自銘於心貲產歲入施散必十之七遇冬出紵絮給賜窮者以為常凡才傑之在困婚葬之弗供與夫水火之不幸苟見聞必周之可謂克迪先訓志于遠大者也嗚呼聊城公始以孝勤致富而富不有家益盛終以貴義教子而

子有立親益顯傳稱積善必餘慶茲非效歟漢樊重以  
君子之富昌子孫名後世以公觀之重不得專美矣為  
之銘曰

人有貧富匪人乃天正以處之天乃可全惟聊城公善  
富不有動必天合確爾其守彼富不仁驚忍且驕厚積  
深閉其心滔滔窶窶弗容桺積自圯傑哉聊城比屋萬  
里身為尚德子述義方堂構益崇列爵有光孝思惟永  
樹此銘刻一門之榮萬世之則



奉訓大夫淮東淮西都轉運副使潘公神道碑

銘

公諱琚字君玉姓潘氏其先本姬姓畢公高之子季孫  
食采於潘子孫以邑氏在唐有制策高第者嘗為宿遷  
令卒葬宿遷遂家焉七世從伯祖竒由宿遷縣教授徙  
邳逮高祖世居邳為大姓繼有潛德而祖尤重厚長者  
尤弟割產獨不分一錢曰吾不忍有是已而致產復益  
饒將終聚諸負券盡焚之而歿二子曰撫同監邳州醋

以卒曰擇公之父也循直有儉德年甫十四而孤當金  
季戈兵擾攘之際輒能自立持其家無削弱之患歲癸  
巳天兵收河南奉其母吳氏挈家北渡翔集濟南遂定  
居焉於是為濟南人其配郭氏公之母太夫人也克謹  
內治慈訓有法生公及其弟息州同知瑾公始就學警  
穎異凡兒識者知其有起家之慶十八推選為吏會轉  
運使田侯闢府山東喜收延人物聞人宿士多萃幕下  
公時以秀發居羣公間侯獨嗜公才論親倚尤密自始

辟轉運知事歷濱萊兩鹽司判副至轉運經歷在山東  
凡八轉至元九年遷河間轉運經歷十一年以最陞承  
事郎同知寧海州事俄改河南宣慰司都事尋加承務  
郎時江南始平河南直南北襟喉之衝文檄叢擾出入  
利害公隨宜裁剴肯綮盤錯以次而辦同僚賴其能十  
七年以勞得五品服轉奉訓大夫淮東淮西都轉運副  
使始公在山東在河間轉運之政稔其利病故始下車  
力以興除為已任前政因習窳敗之弊一切剷去人以

不擾而課入大增兩淮安之及代歸更折節里巷以閑  
適自樂不復仕二十九年二月二十八日春秋六十有  
五以疾終于興仁里第之正寢以其年五月六日葬于  
新塋先人之兆次公配夫人李氏同郡盛族慈孝婉淑  
周於婦道次富察氏東明總帥之女先公卒子男六人  
長曰麟趾行中書省宣慰使次曰昂霄承務郎行御史  
臺監察御史曰思敬淮東宣慰司譯史曰思義淮安崔  
鎮巡檢皆夫人李氏出也思明思順皆幼富察氏出也

女三人長適劉瑜戶部尚書兩淮轉運使中子餘未行  
孫男三人女一人公識度超遠才力夔出不滯一能故  
所歷無難事而能小心廉恪不以所長自足故動必有  
立而名亦隨之至於敦睦孝友又其天性初父以其父  
侯之殯在邳謀遷之濟南未果而卒乃與弟瑾營卜厯  
城天陽山之原為新塋卒遷其祖櫬及奉其伯父撫以  
衣冠之禮胥其父葬焉成先志也至四方有珍異雖十  
里必致其母如在膝下有姑寡無以自存有姨及其夫

流離他邦皆遞養以老其諸子訓以義皆讀書有成達  
子進取自餘族姻里閑困乏者必委曲周恤之公於生  
也始終之道庶幾無少媿矣故其歿也聞者無不驚悼  
嗟惜而弔者與赴者無不盡其哀焉嗚呼使公當大任  
操大柄得以盡展其才則其成就又未可量也位不滿  
德而止於是惜哉將葬其諸孤纍然衰經持廣平陳錫  
所為公行狀泣血再拜請曰先人之葬金華王龍澤誌  
其墓矣麗石未有銘敢請某於其次君昂霄為同學友而

公則父執也其何辭遂銘之銘曰

潘實姬姓其厯惟遠在邳始基有德弗顯惟其弗顯日  
積日崇奕世之慶啓而生公公始就學識者所嘆三語  
辟掾玉雪末冠翱翔山東八遷其官鶚薦既勝乃佐河  
間河南之幕南北攸控事則孔多予處于中爰陟兩淮  
漕政允釐悉其利病淮人之思公才有餘德則誠美進  
不貪位君子之履公既逝矣悲孰可忘有子嗣之公乃  
不亡有隆者封載碑其石曰惟公之藏俾永是式





中庵集卷十六

欽定四庫全書

集部

中庵集卷十七

詳校官中書臣張虎拜

侍讀臣孫球覆勘

謄錄監生臣馮克鞏  
謄錄監生臣董誠

欽定四庫全書

中庵集卷十七

元

劉敏中 撰

碑四

濟南王氏先德碑銘

千歲之木其柯葉摩宮蒼葢巖壑人知其本根之深萬  
里之流其波濤驅雷風沃天日人知其源泉之浚百年  
之家其子孫大門閥昭聲名人知其世德之盛也以今  
言之其吾黨王氏乎按王氏本高唐人七世祖徙濟南

之章丘支蕃派衍蔚為鉅族高祖考諱京為人真淳孝友重義輕貨家園多橘鬻者預入其直率三之一屬隕霜遽以所入歸其人田家往往以農器質錢迫東作知無以為贖即召付之金泰和末歲饑民病發私廩以賑所全活甚衆以年高普恩一官并賜杖嘗手植槐於庭迄今鬱然根盤幄偃人知為瑞云年垂九十無疾而逝妣封氏卒年九十二曾大父諱亨讀書通大義動循禮則充其所知妣鄭氏大父諱廷字君用博學善京垓術

生罹兵荒幼孤比長瀕於死者非一而坦然無憂容居  
常寡言或犯非義弗校以信謹為縣主書聞警潛走避  
黌堂遇羣暴禦將食之識者曰斯善人害之不祥乃得  
釋且護送避所濟南張侯雅知其賢既歸國署敦武校  
尉行元帥府知事經始之際贊畫為多逮以老引年而  
侯亦謝事日燕遊相從盡平生之歡親族之歿於亂者  
皆收柩先塋其齒諱行第密記不忘手為五服圖以譜  
之每一感及則流涕不已知其孝義最隆也壽八十有

五終妣安氏秉內治慈而法先二年卒春秋七十九一  
子是為父諱忱字信卿用子桂貴贈中義大夫上騎都  
尉太原郡伯二女長適李秀次適劉宸都尉公資慧敏  
無不讀之書辯博而有容裕和而能幹城府機械不知  
有之張侯子襲爵署為其屬嘗從述職和林或計事省  
廷辭令既優尤善應變儕輩無及焉陞幕府提領青州  
逆臣瑄有不軌之志時戍連海得兼制濟南兵數千時  
世皇居潛總兵六盤侯遣赴愬兵不可以益晝夜馳未

旬入見奏對稱旨給傳而還撤其兵侯益器重焉中統  
壬戌逆璫寇濟南宗王擁兵南下侯命前邊遂陳擒縛  
之策寇平擢大都督府知事至元乙丑調官制行侯徙  
尹真定辟知事偕往以親老辭俄二親皆棄養喪五年  
未嘗與人接庚午調東平提領案牘遷淄萊己卯授將  
仕郎主朝城縣簿改順德錄事判官以疾去職甲申除  
河間臨邑主簿兼尉卒于官實丁亥四月十有八日也  
壽年六十公益官尤詳治獄所至以遺愛聞苟事隙輒

以詩酒自娛人莫能窺其際嘗戒子孫專儒術刀筆吏  
不可為論者皆以為公有軼倫之才屈於小官未始幾  
微見於色浮沉優游而職揚政舉其高懷曠度固與古  
人為徒較之脅肩病畦折足覆餗而不耻者穹壤矣為  
時推重如此先配夫人張氏濟南權府之女清儉備婦  
道年三十一卒再配夫人馬氏翰林侍讀學士之女有  
懿行撫育前夫人之子如己子教子婦治家咸為矜式  
歲戊寅卒年四十九並贈太原郡太君子男五人女五



人張出男曰杞曰銳杞仕晚終監安丘酒稅銳個儻不  
凡始官歷江陰餘杭案牘官建言更楮幣法世皇召對  
特授尚書省左司都事陞員外郎除諸路寶鈔提舉出  
知滑博興寧海三州皆有能聲皇慶癸丑十一月十八  
日以疾卒女三長適劉彥清次適張珙次適解義馬出  
男曰桂曰椿曰桓椿桓皆早世女二長幼卒次適馬說  
桂六歲知讀書日誦千言旣冠以儒貢歷府寺掾除承  
事郎揚州路興化縣尹憲司薦能入掾中書滿以奉訓

大夫拜監察御史劾擊權要內外震悚乃請加封孔子  
遂有大成頒示之號遷吏部員外郎官奉直大夫大德  
丁未奉命賑旱飢浙間從宜設施民甚賴焉及還武宗  
躬享太廟以與享進階中義大夫至大三年庚戌有追  
贈考妣之命是年分曹上都適留守官得譴選授上都  
副留守明年聖天子嗣服幸上都進嘉議大夫同知上  
都留守司事面奉玉音慰勉且賜貂裘旌其廉能皇慶  
改元之明年大駕再幸上都以大興尹缺詔除大都路

總管兼大興府尹陞辭命進酒且命進階訓以毋怠於  
事賜幣五千緡趣其行留守賀開府奏乞留數四竟不  
允到官寬猛並施京輔大治再踰歲御史臺奏除山南  
道肅政廉訪使上以京尹難其人弗許孫男五人女六  
人杞娶房氏生男二曰遜兵部奏差曰惠未仕女二人  
適某氏某氏銳先娶冒氏生男曰能次娶宋氏生男課  
兒女二幼桂娶李氏河南儒學提舉舟軒先生之女封  
太原郡君生男曰志國子生女二長適張思義次適兵

部尚書張古男國子生重猷曾孫男二遵遂女一慈之  
息也京尹君命其姓能及子志持善狀抵繡江再拜請  
曰桂等以妄庸叨歷顯榮恩眷隆渥念非祖德庇庥先  
訓陶鎔其何能此顧松楸寂寥前美弗彰乃心如焚先  
生辱惠以文載諸石桂願畢矣某旣嘉京尹之孝重感  
都尉府君與先人文靖公疇昔從游之雅不可辭謹述  
而銘之銘曰

善必裕後學必顯親顯孰孝充裕罕善聞王氏奕世種

德惟邁，槐瑞孔昭，宜顯且大。仕莫匪榮，天府奏功。恩莫匪霑，玉音監衷。惕非所堪，官守是敬。方來未艾，必有之慶。昊天永懷，欲報罔期。刻辭貞珉，不朽庶幾。

牛氏先德碑銘

頃余自都下歸陽丘邑，長者奉順大夫知濠州事牛公潤之持善狀請曰：「益不佞賴祖宗庇廕，幸免罪戾，致官五品，嘗痛譜牒散逸，無以周知先世之美。惟是先大父暨先人濟陽君之餘澤遺行，欲吾子文諸石為不朽之。」

傳為松楸之榮為昊天罔極之報敢再拜以請予惟所  
請孝之大者也孝不可違勉為論次之而系以銘按牛  
氏世為濟南章丘人大父諱豫以鑿術鳴資敏厚喜為  
善歲饑民疫出入恒乘黑騾以囊米自附遇貧病者輒  
視而藥之且遺以米使得食以是所全活甚衆鄉人德  
焉配劉氏三子長曰山次泉次傑山傑皆早世泉濟陽  
君也為人魁傑有膽力金季之亂張濟南公擁衆保長  
白之黷堂嶺君以敢勇善騎射選置麾下濟南公既歸

國以侯伯行省事得專除拜從親王略地河南署君百  
夫長實以爪牙任之河南平以勞授濟陽尉猶隸麾下也  
蓋君自弱冠起身事濟南公出入兵間始終殆三十年  
而未嘗有絲毫之失幾微之嫌濟南公亦愛之不使一  
日去左右故濟南公之麾下言質直篤厚無間者唯君  
為稱首其處已尤勤儉以故家益饒歲已百大饑散窖  
粟五百餘石遠近賴焉行遇暴骼必收而掩之見遺物  
必訪而與之此義而能惠又其天性也君挽弓至一石

五斗矢大異常射命中逾里在亂中嘗與弟傑輩母有所往遇羣賊迫至君曰賊敢怖吾母乎謂母萬無恐使傑守之獨束衣握弓矢前山立不動以伺賊意賊望見君識其勇者不敢近遙激衆矢嘗君君皆避之徐引滿發一矢落賊後數十步入地半竒賊拔取視之遽相驚而去中統壬戌李璫叛青州襲濟南濟南張侯度不可禦走京師時君已六十餘歎曰兒子輩旣從張侯矣吾雖老寧能守此坐受賊汙即以私帑并其幼推行將避



之湖山剽者六七輩遮君于道君遽呼躍引五尺挺法  
擊之連擊連中仆其三人賊散走以免觀此其平生志  
趣才量可知已至元庚辰十二月十三日無疾而卒享  
年八十有四葬于邑東南十五里康氏莊之西原從祖  
塋也先是歲辛未十月君久疾有不起之憂夢神仙若  
丘真人者謂君汝是吾弟子汝壽當八十四覺而言之  
翌日疾果愈及卒人始驚異疑公亦仙去矣配張氏淑  
婉備婦道以甲申四月十七日終壽年如其夫及合葬

濟陽君之容體衣衾皆不腐奄若卧寐見者益異之生男四人長曰廣潛德不仕次曰益濠州公也次璠危山巡檢蘄州路稅使多藝有幹局次璘蘄州雜造局使壽春稅副以通敏稱濠州少有俊才文采奕奕動人早以從事辟濟南張侯幕會丞相瑪爾美平章趙公右丞張公奉旨檢括前省乙卯至己未凡五歲內外金穀出入之數仍選諸王府屬各二人共其事而濟南為親王哈坦分邑王以公應選祿秩視左右司郎中公既明辨又素

練達於是諸大人屬目一切仰之事不勞而辦省府既熟公才用凡事關難劇者必以遺公而名聲藉甚青寇之據濟南天兵討之平章趙公實董其師公從行一日遣公詣大帥計事猝遇寇圍公欲降之不屈以刀砍公首復不屈凡三砍竟不死亦不屈乃執公去會晚寇有追襲之恐公伺釁潛襲傷而還大帥躬加勞問給白金五十兩旌其忠且記其名尋為王府郎中歷事三王歲丙子用王府薦授承事郎知濟陽縣轉同知雄州事遷

承直郎蘄州路總管府判官進知濠州其治以廉勤公  
恕去弊因利為主故所至多美政民皆思之濠政之代  
以年及有菟裘之思遂浩然歸鄉里而有是舉嗚呼人  
皆知積貨財廣田宅為子孫之計而不知清白篤厚之  
可以為垂裕之慶而無驕佚墜失之患也人皆知回邪  
曲屈徼取富貴為家門之榮而不知公忠亮直之可以  
為顯親之實而無憂辱顛覆之虞也故余旣述牛氏先  
德之懿復著濠州公之出處大畧欲知所謂垂裕之慶

與夫顯親之實者果不在於彼而在於此云銘曰

長白蟬聯繡水所環康莊有原是為牛氏之阡繫牛氏  
之世莫知其年顯允惟祖植本濬源溉方寸之田得同  
然之天以粒飢樂疾之端知見義勇為之賢顯考繼之  
遭世迭遭委命為知己用何蹇蹇兮桓桓至若掩暴骨  
而遺物必歸閔凶歲而積粟以捐一矢慰母心於畏途  
挺身鏖逆吻之垂涎天報罔愆鳳驤聯翩矯矯濠州迫  
擢孤騫發軔侯藩曳裾王門應青選於天庭動紫微之

星躔實著聲馳乃處承宣隱然良吏之蹟渤海潁川五  
馬來歸皂蓋朱轡松楸之華賁于九泉蓋播之既精而  
獲也則然以創繼言之是謂兩全我作銘詩為牛氏永  
永之傳

商氏世德碑銘

余族弟宥介其戚商氏者見余繡江草堂再拜致其兄  
忠顯君之辭曰進戍江左兵校也始以眇焉之軀委置  
矢石之場出萬死一生食息自若重忝國家爵祿皆出

望外非由祖先積德廕佑曷能致此言念丘壠旌紀寂寥報本之義大懼隕闕謹使弟慶以世次行寔獻先生辱銘諸石存歿惟幸余感其請且以弟戚之故乃為之銘按商氏之先濟南鄒平人其後有徙居陽丘之錦川者故今為陽丘人焉世業農以勤儉嗣守高曾而上失其字諱曾大父三子大父其季也諱清為人疏豁樂施予意懇懇常恐負人而人之負已弗校也春秋六十四以丙辰歲三月十有六日病卒配祖妣王氏以至元三

十年九月十六日卒享年九十有四子男二人長即君之父也次曰友女二人長適卬氏次蘇氏父諱顯和風成有父風而毅敏尚氣識者謂有起家之望旣冠二歲而卒鄉里惜之實庚子歲十一月十有一日也配母吳氏二子長曰進忠顯君也次曰慶叔父天資信厚持家有法事親孝視其兄之子如己子嚴而愛配母王氏子男二人曰璿曰瑄女二人長適馬氏次趙氏忠顯君自其幼時嶷嶷如成人年十七隸名兵間時濟南孟公統



本道兵見其魁傑喜之俾長五十人立麾下及從沂郟  
統軍達春城正陽復入善射之選至元十一年天兵南  
渡江從攻常州先登尋略地福州賊阻高王砦破之第  
功咸獲優賞十五年以行省掾署百夫長領汴兵從戍  
台州俄改戍漳州至衢賊有金姓者擁衆圍衢衢帥以  
請君先以所部擊賊於小南門始接戰手殪數十人賊  
自解去君以賊未逞旦且復來乃潛識賊出入所經要  
害白帥設伏待之明日賊果至城中兵拒戰賊却遇伏

君呼躍奮擊與內兵應賊遂大潰尋追降其衆用是以謀勇聞是後破福建賊黃華於古田剋張治固於湖頭翦詹福三於尤溪皆以致死力取奇效為諸將之最省府上其功朝廷嘉之元貞二年二月奉勅百夫長授忠顯校尉給之銅印緋服祿廩以本兵戍松江君天性孝友質直而廉凡居家仕宦未始有毫髮私獨以武事自意尤精槍法人罕及者蓋商氏之門君以節槩勇敢立聲名於外其叔父暨其諸弟以慈和敬讓厚基本於內

由其大父至於諸孫凡五世上下數百指門風雍肅無  
有異食私蓄閭閻反目之隙故鄉人言孝義而能顯榮  
祖宗者必曰商氏焉易稱積善之家必有所慶以今觀  
商氏之慶詎可量也哉君四娶子男三人女三人始娶  
王氏卒有子二人曰讓曰信早卒女一人適吳氏再娶  
翟氏有子一人曰說女二人一適开氏一幼又王氏李  
氏男孫一女孫二弟慶娶崔氏又丁氏卒子男三人曰  
諒曰誠曰諮女二人長適李氏次幼皆崔出也女孫一

人從弟璿娶孫氏二子曰詢曰諲瑄娶蘇氏子男一人  
曰詡女一人銘曰

惟古得氏氏有商統疏派衍遠莫詳陽丘之商蘊世芳  
敦樸不漓孝義彰根本旣固枝葉昌忠顯乃是白眉良  
早年寘身卒與行一葦要濟浮海航鉉惟一割已自戕  
金至百鍊始益剛出入瀾濤踐榛荒鯨鯢盡戮蛟蛇藏  
薦書上列聲洋洋酬功以爵制有常甲冑一朝化簪裳  
坐覺桑梓生輝先祖考慰兮樂且康錦川平行繡水長

商氏之慶未可量伐石刻名先美揚勗哉後人毋或忘  
姚氏昭先碑銘

姚氏始為濟南齊河人其上世屬金季兵亂失其譜系  
考諱成避地陽丘之南羅因而家焉成資厚重而志意  
宏濶以膽氣自任喜擊刺騎射勇力絕人濟南張侯部  
將馬公雄傑人也時有妹未嫁欲得壯士配一旦得公  
喜甚遂妻之且薦之張侯從侯征河南以驍勇聞俄以  
病免歸因慨然念曰吾祖宗惟力農敦樸勤儉家以殷

厚一經喪亂蕩滅無幾然陰德之所以垂裕子孫者宜不可泯遂戒其子今忠顯君曰汝長矣庶可以試汝遂代吾役吾其教汝兄與汝弟務立基本以無替祖宗之緒于是敦率諸子以孝弟力作為事數歲益富饒而子孫循循有禮讓之節中統初青州李瑣叛奄據濟南民竄避無所得食公自以窖粟五百斛出而賑之賴以全活者甚衆時田野蕭然無一夫把犁者公獨為耒耨自護潛種粟為他日計會親王督兵收瑣適過其所公從數

人舁酒脯迎拜馬前曰野人不知忌諱聞王來敢以卮酒獻王大喜為下馬坐見其所種禾謂公曰向所經未嘗見寸苗是安得有此無乃爾所種而懼為吾兵所殘乎公叩首謝曰惟王憐之王故為久憇令兵盡度乃去禾以不損寇甫平而熟田僅數十畝而所入粟二百餘斛鄉隣復業者皆仰食于公如取已物迨春民耕復無種公又分給之鄉人德焉廣博尊重遂為里中長者以某年某月日春秋八十有九終于家五子長曰珍次曰玉

早卒曰興即忠顯君曰珪曰信馬氏周于婦道先公卒年七十有九初忠顯君以未冠之年代其父荷戈行伍間已自奮拔不凡始戍下邳大帥一見識其可用輒以自隨會宋人入寇帥引兵赴之戰于淮安之巴泥蕩君呼躍奮擊立斃十餘人賊衆潰走因追殺其主將大捷而還帥壯君勇銳假以弓矢勉之歲己未天兵臨鄂渚君以力戰獲賜白金錦綵異等及大軍再舉從擊潭州取江寧戰于沙市畧廣西皆有殊績屢獲銀盃繒帛之



賞江南平遂入為禁旅嘗遣戍和林益蘭以勞授敦武  
校尉親軍百夫長尋賜銀符加授忠顯校尉仍洊賜金  
帛楮幣之數甚渥君沉毅寡言自信無委曲意平居斷  
斷如常人至臨陣對敵躍馬顧盼勇若神人凡重危必死  
之地衆所憚者君常請行以故多奇功及受職益恪謹  
自勵士卒咸畏慕焉今年春以告省冢奠掃之際泣然  
流涕曰吾以一卒出萬死一生叨蒙恩遇分符佩印得  
備宿衛之末為榮甚矣是皆祖先蔭佑所致念所以掄

揚前美者非文諸石莫可遂懇其鄉丈都君持善狀再拜乞銘於余義不得辭乃撫其實而論次之嗚呼古人謂仁者必有後今以姚氏觀之信矣蓋農為生人之本而其為道專固勤動非有巧射倖得窳薄之弊矧能輟已利衆拯其阡危斯誠仁者矣故姚君經百戰之險無一撓之失卒能致身顯達忠孝並著為祖先光榮夫豈偶然哉銘曰

姚氏之先起於齊河亂離是遭爰徙南羅世業以農自

食其力輟已濟衆德惟純一天有顯道曰與善人與善者何在忠顯君赳赳忠顯勇以為孝挺身百戰有進無撓羽林森嚴貔虎所環駢驅角立君超其間賜予旣多恩命凡再奮激厥中矢死罔愛佩符來南松梓有輝言念先德泣然沾衣琢石勒銘匪侈匪報以念其嗣人惟永是效至元二十九年十月日

賈馴昭先碑銘

積善垂統以裕後立身行道以顯親古今所重人之所

同欲也雖然善不欲有心為有心則偷偷則薄後不可裕矣名不欲以倖得倖則辟辟則辱親不可顯矣故無心之善裕後之本也自得之名顯親之實也世亦有無心之善自得之名乎吾於賈氏見之矣賈氏世為濟南鄒平人祖諱福以敦儉自尚二子長諱琚次諱友尚書君父也為人淵淳慎靜不知秤量貿易不知飲酒不知入官府見鄉鄰鬪者輒閉戶避里寡婦孫老矣以白金一罌見託而他適踰十年歸未有請遽付其所託罌封

識宛然婦見之驚泣再拜曰此非敢望也願分其半為  
謝勉而去之竟弗受嘗遇醉人遺絲純道上去無同見  
者獨追及與之又嘗以生組若干約送染人既染染人  
以歸他日視之則約多以十數亟持往還其人愕然悟  
曰此某氏組也偶不知誤忘矣微子吾惟償之耳嗚呼  
為善而若此夫豈有心哉裕後之本也至元辛巳六月  
十日念其子馴久以非辜繫詔獄不解感焉一夕卒年  
六十四配王氏勤儉靜順克完婦道癸巳三月二十日

年七十卒二子曰馴字致道尚書君也曰騏字顯道監濱州稅孝友有為四女長適王氏次李氏次段氏次王氏皆濟南盛族尚書君始由提刑吏陞察院轉戶部歷臺省掾為戶曹主事進中書檢校官剖繁折劇能狀表表以是擢右司都事聲望益著遷兵部員外郎時附京諸驛煩弊狼藉君為一一設法使得輕重均壹諸驛使之而君以歲秩當更驛夫數百戶遮宰相號曰若賈員外去兵部吾屬困苦死矣會成宗獵城南宰相以君見

即日進授郎中官奉直大夫旌其能也踰年改工部加奉政大夫君益精敏自勵毅然以一部失得為己任不以次列介意凡百工五材之用審曲面勢之宜多寡之殊久速之程皆心規目度靡不曲當吏弊無所措同僚仰成而已故太保右丞相深器重之京師始未有孔子廟至是詔有司建立并置國學丞相獨以委君君曰嘻此政化之本敢不敬成入理曹務出營廟事旦夕勤劬無風雨寒暑自其規模位置以及圻墁斲削皆躬為指

授已而構締宏麗廟學俱興首善之觀朝野瞻聳莫不  
咨嗟羨贊咸謂賈君為有功於斯文矣以朝請大夫進  
授侍郎聖天子嗣位拜工部尚書加少中大夫初至元  
間巨姦專政竊生殺柄脅制外內視臺憲善良如仇敵  
山東提刑副使李唐卿正人也巨姦奏請省臺雜治欲  
置李與數十人者於死君時為小吏以連證逮繫者視其  
風旨一與所誣合而君獨以實對困辱百至不易姦臣  
使啗以利誘以官不易脅以死亦不易繫凡三歲執如



前李竟以得免大獄以解時論翕然以古人期君矣迄  
今事業方赫赫日新本基之植實此焉始嗚呼有名而  
若君夫豈倖得哉顯親之實也君今暨其弟騏來再拜  
請曰馴等不佞徒賴先德庥蔭過荷國恩罔極之報悼  
恨無所茲欲刻一石為松楸光華惟得吾子銘可以卒  
志余雅知君者乃為備言之欲知裕後顯親之不可苟  
得也銘曰

九淵之流源乎濫觴百圍之木萌於毫芒其蓄者深其

發也長賈氏之善世蘊弗彰積久彌著乃合天常孰網孰維陰極而陽猗歟工部實膺餘慶巨浸稽天一葦所杭大本既立旁礪翱翔躋貴紫微協吉黃裳臣子之職曷不孔揚繹繹孝思先德不忘刻辭貞珉有永其光

河南谷氏昭先碑銘

武宗繼統之四年考制旌賢頒錫封爵今般陽路總管谷君果之祖贈中順大夫上騎都尉追封長安郡伯祖妣追封長安郡太君父贈少中大夫輕車都尉追封長

安郡侯母封長安郡太夫人君來言曰果以踈繆之質  
遭逢聖時叨沐榮幸恩隆二代念非先德所庇其曷能  
此得先生之辭文諸石以彰不朽敢再拜以請按谷氏  
世為汴之鈞州密縣人高祖而上譜逸不可詳嘗有官  
縣令者祖郡伯府君實其支系諱秀未冠值金季亂徙  
平陽河南平乃歸資剛果英邁不羈而善於治產以是  
富饒雄一邑乃更折節樂賑施以禮義自居里中右之  
有谷半川之號屬有事襄樊兵檄驛使絡繹駢接所過

艱於供億大府知其才選署驛官以幹達稱晚節治家教子益嚴以法一日以貲產析諸子命之曰汝輩長矣其各立而家所以然者庶他日免閱牆之忿而全其同體之愛也母情窳易吾言春秋七十又四以至元三十一年甲午六月二十有五日終於正寢先配司氏太君也壽六十二前卒越三日合祔於邑東南移山陰之原先塋兆次再配李氏三子長曰德即郡侯曰青曰欽皆司出一女李出適王氏郡侯府君為人溫讓侃侃有古

君子之風世之囊橐鈎距機穽巧利無關於心至大已  
酉九月四日年七十二卒配呂氏太夫人也淑婉恭慎  
本諸天性其事舅姑接夫子洽宗戚一與禮合內外無  
間言康壽享祿養宜已一子為總尹君字明之識遠器  
宏風裁峻整幼穎悟異常祖郡伯喜之曰是兒必興吾  
宗始入小學禮制節文目擊心會既長貫通羣籍學博  
而智益明志存濟物屈於施用喟曰古人以良醫比良  
相吾其為醫乎乃悉取方書讀之凡醫之技術皆精故

其已疾若神名馳京師大德初近臣以醫薦入侍成宗  
大見知遇詳勤忠恪行在無舍旦夕賜金錢珍貝玉帶  
第宅以及衣服鞍馬歲月相踵累官朝列大夫同簽太  
醫院事至大改元授朝散大夫廣平路總管下車以廉  
正惠和悉民利病噢咻戢遏得寬猛之宜又以儒學祀  
大成風化之源醫學祀三皇死生所繫其崇飾獎勵尤  
所致力也民歌詠之滿加中議大夫遷般陽其治如廣  
平而聲益大妻張氏安千戶之女封長安郡夫人二子

曰麟駒早卒次幼二女長適崔氏次在室夫善積則後  
必裕名立則親必顯天理之常人事之難者也谷氏上  
世雖不概見以郡伯郡侯觀之其堂構播穫之懿繼述  
遠矣故總尹君之生既學未施遽躋貴近出膺重寄再  
殿大邦前美殊榮焜輝金石郡伯興宗之言為有見矣  
天理人事之合如此乎吾知其門閥之盛方隆而未已  
也銘曰

書載降祥易述餘慶天道冥冥厥顯龜鏡龜鏡者何谷

氏可徵郡伯攸系邑宰是承善富不有好禮樂施才與  
用違訓子見志雍雍郡侯所履日新以天合天猗此吉  
人靈淑挺生起家之子懷寶不售醫以相擬鯢化鵬搏  
一昔九重有莘割烹亦惟其逢侯藩西東聲烈益大榮  
及祖禰忠孝斯在松楸鬱然穹碑屹然流澤騰芳以永  
斯年

中菴集卷十七